

DAVIES, JOHN GLYN (1870 - 1953), ysgolhaig, ysgrifennwr caneuon a bardd

Enw: John Glyn Davies

Dyddiad geni: 1870

Dyddiad marw: 1953

Priod: Hettie Davies (née Williams)

Rhiant: Gwen Davies (née Jones)

Rhiant: John Davies

Rhyw: Gwryw

Galwedigaeth: ysgolhaig, ysgrifennwr caneuon a bardd

Maes gweithgaredd: Llenyddiaeth ac Ysgrifennu; Cerddoriaeth; Barddoniaeth; Ysgolheictod ac Ieithoedd

Awdur: Robert Geraint Gruffydd

Ganwyd 22 Hydref 1870 yn 55 Peel St, Sefton Park, Lerpwl, yn fab i John a Gwen Davies. Masnachwr te oedd ei dad a'i fam yn ferch i **John Jones**, Tal-y-sarn; brodyr iddo oedd **George Maitland Lloyd Davies**, Stanley Davies, a'r Capten Frank Davies. Addysgwyd ef yn y Liverpool Institute. Bu'n gweithio gyda chwmnïau llongau hwylio Rathbone Brothers (1887-92) a'r Cambrian (1892-95), gyda Henry Tate & Sons (1895-96) ac yna gyda'r Mines Corporation of New Zealand (1896-98). Wedi dychwelyd adref (drwy'r Taleithiau Unedig) fe'i perswadiwyd gan **Thomas Edward Ellis** ac eraill i fynd i Goleg Prifysgol Cymru, Aberystwyth i gasglu llyfrgell Gymraeg a fyddai'n sylfaen ymhellach ymlaen i Lyfrgell Genedlaethol Cymru. Bu yn Aberystwyth o 1899 i 1907 a gwneud gwaith da yno, ond yr oedd yn dra anfodlon ar amodau ei swydd. Yn 1907 fe'i penodwyd ar staff llyfrgell Prifysgol Lerpwl ac wedi hynny'n gynorthwyr i'r Athro Kuno Meyer yn adran Gelteg y Brifysgol. Pan ymddolodd Meyer yn 1920 penodwyd J. Glyn Davies yn bennaeth yr adran ac arhosodd yn y swydd hon nes iddo ymddeol yn 1936; ym Mostyn ac yn Ninbych yr oedd yn byw, fodd bynnag. Wedi ymddeol bu'n byw yng Nghaergrawnt, Llandegfan, Llannarth (Ceredigion) a Llanfairfechan; ac yn Llanfairfechan y bu farw 11 Tachwedd 1953. Priododd, 18 Gorffennaf 1908, â Hettie Williams o'r Ceinewydd, Ceredigion, a bu iddynt fab a thair merch.

Cyfrannodd erthyglau ar lenyddiaeth Gymraeg i nifer o gylchgronau a chyhoeddodd *Welsh metrics* (1911). Er gwaethaf ei allu diamheuol ac addewid bendant ei waith cynnar, mympwyol ac anwastad fu cyfraniad J. Glyn Davies i ysgolheictod Cymraeg. Y mae, fodd bynnag, nodau athrylith ar ei caneuon i blant, *Cerddi Huw Puw* (1923), *Cerddi Robin Goch* (1935) a *Cherddi Portinllaen* (1936), a sylfaenwyd, lawer ohonynt, ar caneuon morwyr a glywsai pan oedd yn llanc. Ac y mae yn y gyfrol o farddoniaeth a gyhoeddwyd wedi ei farw, *Cerddi Edern a cherddi eraill* (1955), amryw delynegion sydd yn sicr o fyw. Gellir ychwanegu fod ei atgofion am y gymdeithas Gymreig a adnabu ym more oes, a'i sylwadaeth arni, bob amser yn ddi-ddorol a threiddgar odiaeth.

Awdur

Yr Athro Robert Geraint Gruffydd

Ffynonellau

Hettie Glyn Davies, *Hanes bywyd John Glyn Davies, 1870-1953* (Lerpwl 1965)

Archifau LIGC: [J. Glyn Davies Papers](#)

Darllen Pellach

Delyth G. Morgans Phillips, 'Davies, J. Glyn (1870-1953)', *Cydymaith i Gerddoriaeth Cymru* (Talybont 2018), tt.138-139

Erthygl Wicipedia: [John Glyn Davies](#)

Dolenni Ychwanegol

Wikidata: [Q13129331](#)

Dyddiad cyhoeddi: 1997

Hawlfraint Erthygl: <http://rightsstatements.org/page/InC/1.0/>

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cynorthwng grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n tudalen codi arian am ragor o wybodaeth.

Preifatrwydd a Chwciis
Hawlfraint
Y Prosiect
Cymorth
Cysylltu

LGC
NLW

LLYFRGEL
THE NATION



Yn eiddo gan
Llywodraeth Cymru
Sponsored by
Welsh Government